

歷代賦話

續歷代賦話卷三

嘉善浦 銑柳愚輯

魏

魏東阿王漢末求甄逸女旣不遂太祖因與五官中郎將植殊不平晝思夜想廢寢與食黃初中入朝帝示植甄后玉鏤金帶枕植見之不覺泣時已爲郭后讒死帝意亦尋悟因令太子留宴飲仍以枕資植植還度輾轉少許時將息洛水上思甄后忽見女來自云我本託心君王其心不遂此枕是我在家時從嫁前與五官中郎將今與君王遂用薦枕席懼情交集豈常辭能具爲郭后以糠塞口今被髮羞將此形貌重覩君王爾言訖遂

不復見所在遣人獻珠于王王答以玉珮悲喜不能自勝遂作感甄賦後明帝見之改爲洛神序云黃初三

年余朝京師賦云余從京城言歸東藩魏志曰黃初三年立植爲鄴城王四年徙封雍邱其年朝京師又文紀曰黃初三年行幸許又曰四年三月還洛陽宮然京城謂洛陽東藩卽鄴城魏志及諸詩序並云四年朝此云三年誤

李善洛神賦註

銑按藝苑卮言云洛神賦王右軍大令各書數十本當是晉人極推之耳清徹圓麗神女之流陳王諸賦皆小言無及者然此賦始名感甄又以蒲生當其塘上際此忌兄而不自匿諱何也張溥云植在黃初猜

嫌方劇安敢于帝前思甄泣下帝又何至以甄枕賜
植此國章家典所無也言事因感甄而託名洛神間
有之耳豈待明帝始改此傳會者之過矣 傳記載
太和處士蕭曠自洛東遊夜與洛神問答事涉不經
不濫入

姑婦津相傳言晉太始

武帝年號

中劉伯玉妻段氏字明光

性妬忌伯玉嘗于妻前誦洛神賦語其妻曰娶婦得如
此吾無憾焉明光曰君何以水神美而欲輕我吾死何
愁不爲水神其夜乃自沈而死死後七日託夢語伯玉
曰君本願神吾今得爲神也伯玉寤而覺之遂終身不
復渡水有婦人渡此津者皆壞衣枉妝然後敢濟不尔

風波暴發醜婦雖妝飾而渡神亦不妬也婦入渡河無
風浪者以爲已醜不致水神怒醜婦諱之無不皆自毀
形容以塞嗤笑也故齊人語曰欲求好婦立在津口婦
立水傍好醜自彰

酉陽雜俎

昨加恩辱命并示龜賦披覽粲然音義既遠清辭妙句
焱絕煥炳載歡載笑欲罷不能謹韞櫝耽玩以爲吟頌
陳孔璋答東阿王牋

南陽宗會叔稱君侯有美瑛聞之驚喜笑與抃會乃不
忽遺厚見周稱鄴騎旣到寶瑛初至捧匣跪發爛然滿
目嘉貺益腆敢不欽承謹奉賦一篇以讚揚麗質

魏文帝與

鍾大理書

魏王園中有孔雀久在沼與衆鳥同列其初至也甚見
奇偉而今行者莫抵臨淄侯感世人之待士亦咸如此
故興志而作賦并見命及遂作賦

楊修孔雀賦序

余覽揚雄酒賦辭甚瑰瑋頗戲而不雅聊作酒賦粗究
其終始

曹植酒賦序

銑按揚雄酒賦與酒箴同唯酒醪不入下少一口字
牽于纏徽下無一旦東甌爲甕所輻身提黃泉骨肉
爲泥四句人復借酤借作藉字耳

何楨字元幹青龍

明帝年號

元年天子特詔曰揚州別駕何

楨有文章才識使作許都賦成封上不得令人見楨遂

造賦封上

文士傳

劉楨在曹植坐厨人進瓜楨命爲賦楨賦立成

全上

王粲羽獵賦相公乃乘輕軒駕四駱相公二字似始見

此日知錄

銑按粲從軍行亦用此二字

尹知章字文叔絳州翼城人少時性情夢一赤衣人持
巨斧鑿破其腹若內草茹于心中痛甚驚寤自後聰敏
爲流輩所尊開元中張說表諸朝上召見延英上問曹
植幽思賦何爲遠取景物爲句意旨安在知章以植所
謂賦作不徒然倚高臺之曲隅望且重也處幽僻之閒
深位至卑也望翔雲之悠悠嗟朝霽而夕陰以爲物無
止定之意而上多改易也顧秋華之零落歲將暮也感

歲暮而傷心年將易也觀躍魚于南沼使智者居于明
非得志也聆鳴鶴于北林怨孤和也搦素筆而慷慨守
文而感也揚大雅之哀吟憫其時也仰清風以歎息思
濯煩也寄予思于悲絃志在古也信有心而在遠措者
大也重登高以臨川及上下也何余心之煩錯寧翰墨
之能傳意不盡也此幽思所以賦也上敬異之招禮部
侍郎集賢院正字

河東先生龍城錄

上建安十八年至譙余兄弟從上拜墳墓遂乘馬遊觀
經東園遵渦水高樹之下駐馬書鞭爲臨渦賦

魏文帝
臨渦賦

禰衡所著鸚鵡賦專以自況一篇之中三致意焉如云

嬉游高峻栖峙幽深飛不妄集翔必擇林雖周旋于羽
毛固殊智而異心配鸞皇而等美焉比翼于衆禽又云
彼賢哲之逢患猶棲遲以羈旅矧禽鳥之微物能馴擾
以安處又云嗟祿命之衰薄奚遭時以嶮巇豈言語以
階亂將不密以致危又云顧六翮之殘毀雖奮迅其焉
如心懷歸而弗果徒怨毒于一隅卒章云苟竭心于所
事敢背惠以忘初期守死以報德甘盡辭以効愚予每
三復其文而悲傷之李太白詩云魏帝營八極蟻視一
禰衡黃祖斗筭人殺之受惡名吳江賦鸚鵡落筆超羣
英鏘鏘振金石句句欲飛鳴鷺鷥啄孤鳳于春傷我情
此論最爲精當也

容齋
三筆

項平甫作信美樓記云王仲宣之言曰雖信美非吾土
今曾何足以少留自仲宣至今千有餘年文士一辭曰
此思歸之曲也曾未有考其文而論其心者蓋仲宣漢
貴公孫也少依王室世受國恩雖遯身南夏而繫志西
周彼以爲撫清漳曲沮之流不若灞滻涇渭之速清也
覽昭邱陶牧之勝不若終嶮吳華之亟平也與道路之
一開憂日月之逾邁故憂然以是爲不可久留蓋士之
出處不齊久矣充仲宣之賦當與子美岳陽樓五言太
白鳳凰臺長句同帙而共編不當與張翰思吳之歎班
超玉門之書馬援浪泊西里之念雜然爲一議狀也平
甫此論得仲宣之心矣仲宣不依曹黃二袁而依劉表

意亦可見故仲宣之忠于漢陶淵明之忠于晉羅昭諫
之忠于唐皆詩人文士之識大義有氣節者樓乃胡仲
方爲荆南撫幹時所建 鶴林玉露

蜀

鄴都稻名重思其米如石榴子粒稍大味如菱杜瓊作
重思賦曰霏霏春暮翠矣重思雲氣交被嘉穀應時酉
雜俎

銑按蜀志杜瓊傳瓊字伯瑜蜀郡成都人也

歷代賦話卷四

嘉善浦 銑柳愚輯

晉

晉王獻之字子敬少有盛名風流高邁草隸繼父之美
妙于畫桓溫嘗請回扇誤落筆就成鳥駢特牛極妙絕
又書駢牛賦于扇上此扇義熙中猶在 名圖記

晉武帝爲撫軍時府內後堂砌下忽生草三株莖黃葉
綠若總金抽翠花條苒弱狀似金蓋時人未知是何祥
草故隱蔽不聽外人窺視有一羌人姓姚名馥字世芬
充廐養馬妙解陰陽之術云此草以應金德之瑞及晉
王踐位後以府地賜張華猶有草在故茂先金蓋賦云

擢九莖于漢庭美三株于茲館貴表祥乎金德名比類而相亂至惠帝光熙元年三株草化爲三樹枝葉似楊樹高五尺以應三楊擅權之事時有楊駿楊瑤楊濟三弟兄號曰三楊馬圍老羌所說之驗 王嘉拾遺記

陸機少襲領父兵爲牙門將軍年二十而吳滅退歸舊里與弟雲勤學積十一年與弟俱入洛機妙解情理心識文體故作文賦 臧榮緒晉書

銑按杜詩陸機二十作文賦 宋理宗寶慶初書文賦以賜天下見山堂肆考又右軍曾書文賦褚河南亦有臨右軍文賦米芾書文賦趙子昂亦書文賦見陳繼儒書圖史

陸機以齊王罔矜功自伐作豪士賦刺之乃託身于成都王穎謂可康隆晉室此在恩怨愛憎之間爾處危懼之世而用心若此又濟之以貪權喜功雖欲苟全可乎
避暑錄話

陸士衡豪士賦云身危由于勢過而不知去勢以求安禍積起于寵盛而不知辭寵以招福石季倫金谷澗詩序云感性命之不永懼凋落之無期二人者攷其終所及祗自道也
陸樹聲清暑筆談

羊祜鴈賦排雲墟以頽頽汰弱波以容與進凌厲乎太清退嬉遊于元渚鳴則相和行則接武前不絕貫後不越序齊力不期而並至四趣不要而自聚當其赴節則

萬里不能足其路苟泛一壑則衆物不能易其所臨空
不能頓其翼揚波不能戢其羽浮若漂舟乎江之濤色
若委雪乎巖之阿邕邕兮悲鳴雲間因飛凌虛屬清和
眇眇兮瞥入清塵拂日捐翼景光羅

升鉛總錄

銑按升庵自注云此賦諸類書不載然又不言其所
自得明人俞安期作唐類函載入鳥部節取鳴則相
和至揚波不能戢其羽十二句四趣作同趣

左思父雍起小吏以能擢爲殿中侍御史思少學鍾繇
書及鼓琴皆不成雍謂友人曰思所曉解不及我少時
也思乃發憤造齊都賦一年不出戶牖

王隱晉書

左思別傳思博覽名文徧閱百家司空張華辟爲祭酒

賈謐舉爲秘書郎謐誅歸鄉里專思著述齊王問請爲
記室叅軍不起時爲三都賦未成也後數年疾終其三
都賦改定至終乃上初作蜀都賦云金馬電發于高岡
碧雞振翼而雲披兎彈飛丸以礮礲火并騰光以赫曦
今無兎彈故其賦往往不同思爲人無吏幹而有文才
又頗以椒房自矜故齊人不重也又云思造張載問嶠
蜀事交接亦踈皇甫謐西州高士摯仲治宿儒知名非
思倫匹劉淵林衛伯輿並蚤終皆不爲思賦序注也凡
諸注解皆思自爲欲重其文故假時人名姓也世說注
銑按太冲三都賦自是不謝班張乃云假諸人爲重
何其陋耶別傳不知何人所作定出怨謗之口不足

信也

龍眼惟閩與南越有之左思蜀都賦云旁挺龍目亦不自知其失也

黃氏日抄

地名割用一字如左思蜀都賦跨躡犍泮是犍爲泮牂二郡魏都賦恒碣礧礧于青霄是恒山碣石二山

日知錄

三國志張遼傳爲起第舍又特爲遼母作殿左思魏都賦都護之堂殿居綺窻是人臣亦得稱殿也

生曰名死曰諱今人多生而稱人之名曰諱金石錄云生而稱諱見于石刻者甚衆東晉勸農賦塲功畢租輸至錄社長召闔師條牒所領注列名諱

以縣令而稱朝晉潘岳爲長安令其作西征賦曰勵疲

純以臨朝是也

並全上

方言吳有柰娥之臺東晉賦朝享五鼎之奉夕宿柰娥之房柰卽七也太元七政亦作柰賾河南書枯樹賦亦作柰

陳繼儒枕譚

西征賦歲次元楊月旅蕤賓丙丁統日乙未御辰李善曰岳傷子序云元康二年五月余之長安以歷推之元康二年歲在壬子乙未五月十八日也爾雅太歲在子曰困敦左氏傳梓慎曰歲在星紀而淫于元楊杜預曰歲歲星也元楊在子虛危之次也然元楊歲星所歷困敦太歲所次今論太歲而曰元楊疑誤也面終南而背雲陽跨平原而連嶓冢善曰漢書武功太一古文以

爲終南此賦下云太一明與終南別山西京賦曰于前則終南太一二山明矣

文選注

升曲沃而惆悵惜兆亂而兄替枝末大而本披都耦國而禍結善曰曲沃在河東聞喜縣酈善長水經注曰春秋晉侯使詹嘉守桃林之塞處此以備秦時以曲沃之官守之故有曲沃之名然此曲沃在西因彼曲沃而得名今因名而說彼

銑按岳以陝之曲沃爲成師所居顏師古于漢書高帝紀注中曾指其謬得因名說彼之解則此句無可議矣乃亦黃門之忠臣也

成七國之稱亂翻助逆以誅錯注錯七故切今協韻七

各切 並全上

銑按漢書鼂錯傳注晉灼曰音厝置之厝師古曰據申屠嘉傳叙云責通請錯匪躬之故以韻而言晉音是也西征賦乃讀爲錯雜之錯不可依也

方言云賜盡也西征賦若循環之無賜

日知錄

西征賦混雜犬而亂放各識家而競入唐李義府多取人奴婢及敗各散歸其家時人爲露布云混奴婢而亂放各識家而競入

潘岳秋興賦宵耿介而不寐兮獨展轉于華省悟時歲之遵盡兮慨俛首而自省用二省字 並全上

潘岳藉田賦善曰晉書曰丁亥藉田戊子大赦今爲丁

未誤也

文選注

太山羊肅亦稱學問讀潘岳賦周文弱枝之棗爲杖策之杖

顏氏家訓

統按句出閒居賦

江南有一權貴讀誤本蜀都賦注解蹲鳴芋也乃爲羊字人饋羊肉答書損惠蹲鳴舉朝驚駭不解字義久後尋迹方知如此

自古宏才博學用事誤者有矣百家雜說或有不同書儻湮滅後人不見故未敢輕議之今指知夾紕繆者以爲誠詩云有鷩雉鳴又曰雉鳴求其牡毛傳亦曰鷩雉雉聲又云雉之朝雉尚求其雌鄭元注月令亦云雉雉

上 雉鳴潘岳賦曰雉鷺鷥以朝雉是則混雜其雄雌矣並全

銑按徐爰射雉賦注云雌雉不得言雉顏之推以潘爲誤用也按詩有鷺雉鳴則云求牡及其朝雉則云求雌今云鷺鷥朝雉者互文以舉雄雌皆鳴也余讀之不覺擊節

前瞻太室傍眺嵩邱小說曰昔傅亮北征在河中流或人問之曰潘安仁作懷舊賦曰前瞻太室傍眺嵩邱嵩邱太室一山何云前瞻傍眺哉亮對曰有嵩邱山去太室七十里此是寫書誤耳

李善注

世之言神仙者多矣然未之或驗也至如苴氏之婦則

近信而有證者夫鬼魅之下人也無不羸病損瘦迺平安無恙而與神女飲宴寢處縱情極意豈不異哉予覽其歌詩辭旨清偉故爲之作賦

張敏神女賦序

銑按搜神記曰濟北弦超嘉平

魏齊王芳年號

中夜夢神女

從之自稱天上玉女東郡人姓成公字智瓊早失母天帝哀其孤苦令得下界從夫當其夢也嘉美非常覺寤欽想如此三四夕旦顯然來遊駕輜輶車從八婢服綾羅綺繡狀若飛仙自言年十七遂爲夫婦贈詩曰飄飄浮勃逢敖雲石滋神仙豈虛降應運來相之

晉永嘉

懷帝年號

亂旣已至江諸公主不得隨去安陽公主

平城公主奔入兩河界悉爲民家妻常怏怏不悅有故鄉之思村民感之共築一臺以居之謂之公主望鄉之館至今巋然王昶懷舊賦云將軍出塞之臺公主望鄉之館漢成帝遣將軍王潰戍邊及王莽篡逆潰與莽有隙遂留不敢歸因逃入胡中士卒相率築臺爲望鄉之處

在昉述異記

僖檀利鹿孤弟也嘉平元年十一月僭卽涼王位立世子虎臺爲太子二年正月以子明德歸南中郎將領昌松太守歸雋爽聰悟檀甚寵之年始十三命爲昌高殿賦援筆卽成景不移漏檀覽而善之擬之曹子建

前涼錄

家弟以虞氏梨賦見示余謂豈以梨爲有用之爲貴杜

無用之爲賤故無用獲全所以爲貴有用獲殘所以爲賤故賦云爾

孫楚枕杜賦序

大才治世猶櫛之理髮也理髮不可無櫛治世不可無才

傳咸櫛賦序

先君作芸香賦詞美高麗有覩斯卉蔚茂馨香同遊使余爲賦

傳咸芸香賦序

傅元硯賦云木貴其能軟石美其潤堅劉道友以浮查爲硯知古亦有木硯

硯譜

人有遺余琉璃卮者小兒竊弄墮之不潔意旣惜之又感物之汚辱乃喪其所以爲寶况君子行身而可以有

玷乎

傳咸汚卮賦序

潘尼與同僚飲主人有琉璃盃使客賦之尼于座立成
文士傳

傅咸畫像賦序先畫卞和之像者雖其事在素定見其
涕血殘刑之形情以悽然至臧文仲知柳下惠之賢而
不與立卞和自刑以相證相去遠矣戲畫其像于卞子
之旁特赤其面以示猶有慙色

銑按此題畫賦之始

璞以中興王宅江外乃著江賦述川瀆之美

晉中興書

銑按日知錄曰郭璞江賦總括漢泗兼包淮湘淮泗
並不入江豈因孟子而誤耶

許漢陽本汝南人也貞元中舟行于洪饒間日暮江波

急尋小浦路入不覺行三四里到一湖中雖廣而水纔二三尺又北行一里許見湖岸竹樹森茂乃投以泊舟漸近見亭宇甚盛有二青衣延入宅內見女郎六七人目未嘗覩一女郎取一卷文書以示漢陽覽之乃江海賦女郎令漢陽讀之遂爲讀一遍女郎又請自讀一遍命青衣收之四更而別

博異志

庾闢始作揚都賦道溫庾云溫挺義之標庾作民之望方響則金聲比德則玉亮庾公聞賦成求看兼贈賦之闢更改望爲儔以亮爲潤云

世說新語

銑按中興書闢爲揚都賦邈絕當時又臨川原本云賦成以呈庾亮亮以親族之懷大爲其名價云可三

二京四三都于是人人競寫都下爲之紙貴謝太傅云不得爾此是屋下架屋事事擬學而不免儉狹孫綽賦遂初築室畎川自言見止足之分

桓元旣篡位將改置直館問左右虎賁中郎省應在何處有人答曰無有當時殊忤旨問何以知無答曰潘岳秋興賦序曰余兼虎賁中郎將寓直散騎之省元咨嗟稱善

銑按世說注劉謙之晉記曰元欲復虎賁中郎將疑應直與不訪之僚佐咸莫能定叅軍劉簡之對曰昔潘岳秋興賦序云余兼虎賁中郎將寓直于散騎之省以此言之是應直也元懼然從之此語微異又答

者未知姓名故詳載之

裴郎作語林始出大爲遠近所傳時流年少無不傳寫
各有一通載王東亭詢作經黃公酒壚下賦甚有才情
殷荊州有所識作賦是東暫慢戲之流殷甚以爲有才
語王恭適見新文甚可觀便于手巾函中出之王讀殷
笑之不自勝王看竟不笑亦不言好惡但以如意帖之
而已殷悵然自失

許元度

詢

言琴賦所謂非至精者不能與之析理劉尹

其人

嵇真長
丹陽尹

非淵靜者不能與之閑止簡文其人

並全

五臣注文選蓋荒陋愚儒也今日讀嵇中散琴賦云聞
遼故音痺弦長故徽鳴所謂痺者猶今俗云攸聲也兩

手之間遠則有放故云間遼則音痺徽鳴者今之所謂
泛聲也弦虛而不按乃可泛故云弦長則徽鳴也五臣
皆不曉妄注又云廣陵止息東武太山飛龍鹿鳴鷓鴣
游弦中散作廣陵散一名止息特此一曲耳而注云八
曲其他淺妄可笑者極多以其不足道故畧之聊舉此
使後之學者勿憑此愚儒也

東坡書文選後

雲再拜前省皇甫士安高士傳後作逸民賦今復送之
如欲報稱久不作文多不悅澤兄爲小潤色之可成佳
物願必留思

陸雲與兄平原書

公之半歲暮賦甚欲成之而不可自用得此百數十字

今送不知于諸賦者不罷少不想少佳成當送到洛陳琳大荒甚極自雲作必過之想終能自果耳

兵真凶事生來初不見習頃觀之正自使人意惡羊腸轉時極佳問人皆不解何以作此轉雖云欲相泄恐此正自取好耳說之不能工願兄試一說之張義元答員淵之回流崑崙吐河不體正自似急水中山石間是人謂回轉者但言之辭不工耳不知此中詔于諸賦中何如

銑按清河集有羊腸轉賦

四言五言非所長頗能作賦爲欲作十篇許小者以爲一分生于愁思遂復文誨欲得雲論間在郡紛紛有所

鈞定言語流行斷絕欲更定之而了不可以思慮今自好醜不可視想冬下體中佳能定之耳

省諸賦皆有高言絕典不可復言頃有事復不大快凡得再三視耳其未精倉卒未能爲之次第省述思賦深情至言實爲清妙恐故復未得爲兄賦之最兄文自爲雄飛非累曰精拔卒不可得言文賦甚有辭奇語頗多文適多體便欲不清不審兄呼爾不扇賦腹中愈首尾發頭一而不快言烏云龍見如有不體感遊賦愈前恐故當小不然一至不復減漏賦可謂清工兄頓作爾多文而新奇乃爾真令人怖不當復道作文

雲方欲更作引述思賦儻自竭厲然雲意皆已盡不知

本復何言方當積思思有利鈍如兄所賦恐不可須
前日觀習先欲作講武賦因欲遠言大體欲獻之大將
軍才不便作大文得少許家語不知此可出不故鈔以
白兄若兄意謂此可成者欲試成之大文難作庶可以
爲關雎之見微

九慙不多不當小減九悲九愁連日鈔除所去甚多才
本不精正自極此願兄小爲之定一字兩字出之便欲
得遲望不言

登樓賦無乃煩感邱

誨二賦佳久不復作文又不復視文章都自無次第文
章旣自可美且解愁忘憂但作之不工煩勞而棄力故

久絕意耳前作二篇後爲須欲有所作以慰小思慮便大頓極不知何以乃爾

嘗聞湯仲欽九歌昔讀楚辭意不大愛之頃日視之實是清絕滔滔故自是識者古今來爲如此種文此爲宗矣視九章時有善語大類是穢文不難舉意視九歌便自歸謝絕思兄常欲其作詩文獨未作此曹語若消息小佳願兄可試作之兄復不作者恐此文獨單行于載間嘗謂此曹語不好視九歌正自可歎息王褒作九懷亦極佳恐猶自繼貞元盛稱九辯意甚不愛遣信當送九愍三賦脫然可謂舉意

前登城門意有懷作登臺賦極未能成而崔君苗作之

聊復成前意不能令佳而羸瘁累日猶云愈前二賦不審兄平之云何願小有損益一字兩字不敢望多

銑按觀此條則楊用修所謂唐人云君苗無姓宛委編曰君苗姓應瑒之從弟見文選注皆未嘗見清河集者也

九慙如兄所誨亦殊過望雲意自謂當不如三賦情難非體中所長欲徧周流雲意亦謂爲佳耳然不云其愈于與漁父吾今多少有所定及所欲去留欲尔今送本往不審能勝故否意亦殊未以爲了

誨歲暮如兄所誨雲意亦如前啟情言深至述思自難希每憶常侍自論文爲當復自力耳雲意呼發頭但當

小不如復耳兄乃不好者試當更思之所誨雲文所比
愁霖喜霽之徒實有可尔者登樓名高恐未可越尔兄
文方當日多但文實無貴于爲多多而如兄文者人不
厭其多也九悲多好語可航詠但小不韻耳皆已行天
下天下人歸高如此亦可不復更耳兄作大賦必好意
精時故願兄作數大文近日視子安賦亦對之歎息絕
工矣兄誨又尔故自是高手

古今兄文所未得與校者亦惟兄所道數都賦耳其餘
雖小有勝負大都自皆爲雄耳張公父子亦語雲兄文
過子安子安諸賦兄復不皆過其便可可不與供論雲
謂兄作二京必傳無疑久勸兄爲耳又思三都世人已

作是語觸類長之能事可見

銑按張公茂先也子安成公綏也

誨九愍如所勅此自來定然雲意自謂故當是近所作
上近者意又謂其與漁父相見以下盡篇爲佳謂兄必
許此條而淵弦意呼作脫可行耳至兄惟以此爲快不
知雲論文何以當與兄作如此異此是情文但本少情
而頗能作汎說耳又見作九者多不祖宗原意而自作
一家說惟兄說與漁父相見又不大委曲盡其意雲以
原流放惟見此一人當爲致其義深自謂佳願兄可試
更視與漁父相見時語亦無他異附情而言恐此故勝
淵弦兄意所謂不善願䟽勅其處緒亦欲成之令山意

莫更感如惡所在

誨前二賦佳視之行已復不如初昔文自無可成藏之甚密而爲復漏顯世欲爲益者豈有謂之不善而不爲懷此不成意想兄已得懷之耳有作文惟尚多而家多猶羊之徒作蟬賦二千餘言旣無藻緯體都自不似事文章實自不當多間視大荒傳欲作大荒賦旣自難工又是大賦恐交自困絕矣

久不復作文了無復次第真元昔屢聞周侯至論前此霖雨此下人亦作愁霖賦好醜見敦又因人見督自愁慘又了無復意此家勤勤難達之亦復毒此雨憂邑聊作之因以言哀思又作喜霽今送雲作爲易得耳窮不

好故都絕意此間人呼作者皆休故不得有所送不審此何成已出之故爲存不棄耳

君苗文天才中亦少尔然自後能作文雲惟見其登臺賦及詩頗作愁霖賦極佳頗倣雲雲所如多恐故當在二人後然未究見其文見兄文輒云欲燒筆視以爲此故不喜出之

今送君苗登臺賦爲佳手筆云復更定復勝此不知能愈之不其人推能兄文不可言作文百餘卷不肯出之視仲宣賦集初述征登樓前耶甚佳其餘平平不得言情處此賢文正自欲不茂不審兄呼爾不愁霖喜霽殊自委頓恐此都自易勝

頃哀思更力成歲暮賦適且畢猶未大定自呼前後所未有是雲文之絕無又憶兄常云文後成者恒謂之佳貞小爾恐數自後轉不如今且欲寄之 並仝上

詩人多用南雲字不知所出或以爲江總心逐南雲去身隨北雁來爲始非也陸機思親賦云指南雲以寄欽望歸風而效誠陸雲九愍云眷南雲以興悲蒙東雨而涕零蓋又先于江總矣 揚升庵文集

銑按陸士龍贈鄭曼季詩聲播東汜響溢南雲又真誥東華靈妃歌云裊璫南雲扇香風鼓錦披然不獨南雲可紀也阮嗣宗大人先生傳來東雲駕西風陶徵士荅龐參軍詩依依南楚邈邈西雲江文通詩北

雲竦征人

陶彭澤歸去來辭云既自以心爲形役奚惆悵而獨悲
是此老悟道處若人能用此兩句出處有餘裕也

許彥周詩話

銑按陶翁之辭鼂无咎以其爲古賦之流而取之入
楚辭朱子以爲是也又朱子詩一咏歸來賦頓將形
迹超余故併歸賦門 東坡有叩歸去來辭

歐陽文忠言晉無文章唯陶淵明歸去來兮一篇而已
東坡志林

銑按嬾真子淵明乙丑生至乙巳歲賦歸去來是時

四十一矣

歸去來辭云雲無心而出岫鳥倦飛而知還此陶淵明
出處大節非胷中實有此境不能爲此言也

避暑錄話

李格非善論文章嘗曰諸葛孔明出師表李令伯陳情
表陶淵明歸來引皆沛然如肝肺中流出殊不見有斧
鑿痕是數君子在後漢之末兩晉之間初未嘗以文章
名世而其詞意超邁如此吾是以知文章以氣爲主氣
以誠爲主

墨客揮犀

淵明詩文率皆紀實雖寓興花竹間亦然歸去來辭云
景翳翳以將入撫孤松而盤桓其飲酒詩二十首中一
篇云青松在東園衆草沒其姿凝霜殄異類卓然見高

枝連林人不見獨樹衆乃奇所謂孤松者是已此意蓋以自况也

容齋三筆

策扶老以流憊謂扶老藤也見後漢蔡順傳注

田學紀聞

白璧微瑕惟在閒情一賦揚雄所謂勸百而諷一者卒

無諷諫何足搖其筆端惜哉亡是可也

昭明太子陶淵明集序

銑按閒情賦序云初張衡作定情賦蔡邕作靜情賦檢逸辭而宗澹泊始則蕩以思慮終歸閑正將以抑流宕之邪心諒有助於諷諫綴文之士奕代繼作並因觸類廣其辭義余園閣多暇復染翰爲之雖文妙不足庶不謬作者之意乎

東坡云余讀文選恨其編次無法去取失當淵明作閒

情賦所謂國風好色而不淫正使不及周南與屈宋所
陳何異而統大譏之此乃小兒強作解事者

漁隱叢話

陶淵明閒情賦必有自乃出張衡同聲歌云邂逅承際
會偶得充後房情好新交接颺慄若探湯思爲莞蒨席
在下蔽匡牀願爲羅衾幃在上衛風霜

西溪叢語

昔董仲舒作士不遇賦司馬子長又爲之余嘗以三餘
之日講習之暇讀其文慨然惆悵夫履信思順生人之
美行抱朴守靜君子之篤素自真風告逝大僞斯興間
閭懈廉退之節市朝驅易進之心懷正志道之士或潛
玉于當年潔已清撝之人或沒世以徒勤故夷皓有安
歸之歎三閭發已矣之哀悲夫寓形百年而瞬息已盡

立行之難而一城莫賞此古人所以染翰慷慨屢伸而不能已者也夫導達志氣其惟文乎撫卷躊躇遂感而賦之

陶潛感士
不遇賦序

銑按董仲舒司馬子長二賦俱傳

宋本昭明文選賦云思乙乙其若抽說文解乙字云象
壽草木冤曲而出陰氣尚彊其出乙乙也司馬遷律書
云乙者萬物生軋軋也漢書律歷志奮軋于乙穀梁傳
軋辭范甯注軋委曲也劉熙釋名云乙軋也自相軋而
出也則軋者乙之詁也梁江革嘲何記室聯句不成云
嘯昔故翩翩今辰何乙乙元結補樂歌序乙乙冥冥有
純古之聲雲間之藍本乎松雪行楷作軋軋字殊誤又

受虽拙目之虽宋本作吹世間文籍改金根車者故不
乏深可歎

吹景集

晉陌上桑曲天路險艱獨後來楚辭九歌路險艱兮獨
後來晉曲全襲此辭

全上

銑按困學紀聞云宋書樂志陌上桑曰楚辭鈔以九
歌山鬼篇增損爲之東坡因歸去來爲詞亦此類也
庾儵云余宅近南城有冰井方夏之月乃攜友生登而
遊從徬徨徘徊婁其以寒乃作冰井賦

述征記

續歷代賦話卷五

嘉善浦 銑柳愚輯

南北朝

鮑照妹令暉有才思著香茗賦

陸龜蒙小名錄

復齋漫錄云豫章有南浦亭前輩賦詠多以江淹別賦
送君南浦傷如之何爲始余觀楚詞云予交手兮東行
送美人兮南浦乃知江淹取此也

漁隱叢話

宋監典事區惠恭本胡人爲顏師伯幹顏爲詩筆輒偷
定之後造獨樂賦語侵給主被斥

鍾嶸詩品

吳均集有破鏡賦昔者邑號朝歌顏淵不舍里名勝母
會參歛襟蓋忌夫惡名之傷實也破鏡乃凶逆之獸事

見漢書爲文幸避此名也

顏氏家訓

銑按晁氏讀書志梁吳均叔宰集三卷顏之推譏均集中有破鏡賦今亦亡之

江淹恨賦孤臣危涕孽子墜心李善曰心當云危涕當云墜江氏愛奇故互文以見義

文選注

梁庾信從南朝初至北方文士多輕之信將枯樹賦以示之于後無敢言者

朝野僉載

庾子山枯樹賦云建章三月火按史記武帝太初元年冬十一月乙酉柏梁臺灾春二月起建章宮西京賦柏梁旣灾越巫陳方建章是經用厭火祥是灾者柏梁非建章而三月火又秦之阿房非漢也哀江南賦云榑陽

亭有離別之賦按漢書藝文志別柵陽賦五篇詳其上
下文例當是人姓名姓別名柵陽也以爲離別之別又
非也

日知錄

開成中有江叟者多讀道書廣尋方術善吹笛往來多
在永樂縣靈仙閣時沈飲酒適闋鄉至盤谷館東官道
大槐樹下醉寢及夜艾稍醒聞一巨物行聲舉步甚重
叟聞窺之見一人崔嵬高數丈至槐側坐而以毛手捫
叟曰我意是樹畔鋤兒乃窺邈畢卓爾遂敲大樹數聲
曰可報荆館中二郎來省大兄大槐乃語云勞弟相訪
似聞槐樹上有人下來與語須與飲酌之聲交作荆山
槐曰大兄何年拋却兩京道上槐王耳大槐曰我三甲

子當棄此位荆山槐曰大兄不知老之將至猶顧此位
直須至火入空心膏流斷節而方知退大是無厭之士
何不如今因其震霆自拔于道必得爲材用之木構大
厦之梁棟尚存得重重碎錦片片真花豈他日作朽蠹
之薪同入爨爲煨燼耳大槐曰雀鼠尚貪生吾焉能辦
此事耶槐曰老兄不足與語告別而去

傳奇見太平
廣記木怪部

銑按火入空心重重碎錦四句皆枯樹賦

李君翁詩話卜居云寧誅鋤草茅以力耕乎詩人皆以
爲宋玉事豈卜居亦宋玉擬屈原作耶庾信哀江南賦
云誅茅宋玉之宅不知何據而言此君翁之陋也唐渚
宮故事曰庾信因侯景之亂自建康遁歸江陵居宋玉

故宅故其賦曰誅茅宋玉之宅穿徑臨江之府

西漢
蒙恬

哀江南賦過漂渚而寄食託蘆中而渡水漂渚當是漂

渚之誤張勃吳錄曰子胥乞食處在丹陽溧陽縣史記

范睢傳伍子胥橐載而出昭關至于陵水索隱曰劉氏

云陵水卽粟水也吳越春秋云子胥奔吳至溧陽逢女

子瀨水之上

古溧瀨
同字

子胥跪而乞餐女子食之旣去自

投于水後子胥欲報之乃投白金于此水今名其處爲

投金瀨金陵志曰江上有渚曰瀨渚者是也或以二句

不應皆用子胥事不知古人文字不拘如下文生世等

於龍門四句亦皆用司馬子長事

日知錄

王逸楚辭章句言淮南王安博雅好古招懷天下俊偉

之士著作篇章分造辭賦以類相從故或稱小山或稱大山其義猶詩有小雅大雅也枯樹賦小山則叢桂留人扶風則長松繫馬是以山爲山谷之山失其旨矣全予往歲在大理與姜孟賓讀蕭子雲賦有長卿晚翠簡子秋紅之句孟賓吳人博學予舉以問曰長卿則草中徐長卿藥名是也簡子亦必草木名出何書耶孟賓亦不能知呼取本草徧檢之無有也近觀齊民要術云簡子藤生緣樹木實如梨赤如雞冠核如魚鱗取生食之淡泊甘苦乃知子雲引用必此物也聊筆于此王應麟嘗言得一異事如獲一真珠船恨不與孟賓散帙共欣賞耳

賞耳

丹鉛總錄

御史牀虞詡爲長沙桓王所待設此牀以表賢詡仕漢至御史故梁元帝元覽賦云御史之牀猶在都護之門不修

樂史太平寰宇記

高似孫緯畧金樓子云劉子元爲水仙花賦時人謂不減洛神子固不敢望知幾云云按金樓子者梁元帝也劉子元知幾也知幾在證聖中作史通二十卷後以名類元宗改名子元在元帝後百餘年矣御覽引金樓子云劉休元爲水仙賦云云是南宋南平王鏐也水仙乃水上神女陶宏景亦有賦高氏以休元爲子元以水仙爲花名豈不謬歟

王士禛古夫于亭雜錄

正始寺百官等所立也正始中立因以爲名在東陽門

外御道南所謂敬義里也南有招德里里內有尚書僕射游肇御史尉李彪 兵書崔林幽州刺史常景司農張倫等五宅彪景出自儒生居室儉素唯倫最爲豪俊齋宇光 服玩精奇車馬出入逾于邦君園林山池之美諸王莫及倫造景陽山有若自然其中重巖複嶺崱峴相屬深谿洞壑邐迤連接高林巨樹足使日月蔽虧懸葛垂蘿能令風煙出入崎嶇石路似壅而通崢嶸澗道盤紆復直是以山情野興之士遊以忘歸天水人姜質志性疎誕麻衣葛巾有逸民之揔見偏愛之如不能已遂造山亭賦行傳于世

後魏楊衒之洛陽伽藍記

銑按賦全載記中茲不錄

稽聖賦三卷北齊黃門侍郎顏之推撰其孫師古注蓋擬天問而作中興書目稱爲李淳風注

陳氏書錄解題

大衆賦唐志謂黃冠子李播撰李台集解播淳風之父也今本題楊炯撰畢懷亮注館閣書目題張衡撰李淳風注薛士龍書其後曰專本巫咸星贊旁覽不及隋書時君能致之蘭臺坐卧渾天儀之下其所論者何止此耶愚觀賦之末曰有少微之養寂無進賢之見譽恥附耳以求達方卷舌以幽居則爲李播撰無疑矣播仕隋高祖時棄官爲道士時未有隋志非旁覽不及也張衡著靈憲楊炯作渾天賦後人因以此賦附之非也

困學紀聞

庾信馬射賦云落花與紫葢齊飛楊柳共春旗一色王

勃傲其語江左卑弱之風也

瓊赤玉也雪賦林挺瓊樹注以爲誤

堯韭舜榮梁元帝元覽賦始用上

呂向雪賦注隱公時雪平地一尺是歲大熟深寧叟駁
之謂歲熟語無據按春秋考異郵云庚辰雪深七尺後
周劉瓚雪賦云庚辰有七尺之厚向陋生不知据此

集

北齊頓邱李諧彭城王疑之孫吏部尚書平之子少俊
爽有才辯爲黃門侍郎除名作述身賦其畧曰獨浩然
而任已同虛舟而不繫旣未識其所以來豈知其所以
逝于是得喪同遣忘懷自深遇物棲息觸地山林雖類

西浮之跡何異東都之心

談薈

續歷代賦話卷六

嘉善浦 銑柳愚輯

唐

寶泉兄蒙語例云吾弟子鑒詞藻雄贍草隸精深晚年著述書賦精窮旨要詳辨秘義凡七十四首六千言并注二百四十句

法書要錄

范陽盧獻卿大中中舉進士詞藻爲同流所推作愍征賦數千言時人以爲庾子山哀江南之亞司空圖爲注之

本事詩

銑按新唐書宋史藝文志俱載盧獻卿愍征賦一卷吾往見薛收白牛溪賦韻趣高奇詞義曠達嵯峨蕭瑟

真不可言壯哉邈乎揚班之儔也吾近作河渚獨居賦
爲仲長先生所見以爲可與白牛連類今寫一本以相

示

王績與馮
子華書

銑按績自號東臯子集有其友呂才序稱其幼岐嶷
年十五調楊素占對英辨一坐盡傾以爲神仙童子
薛道衡見其登龍門憶禹賦嘆曰今之庾信也

吏部侍郎王邱試竹簾賦降階鈞拜以殊禮待之

顏真卿孫

遞文
集序

姚鉉集唐人所爲古賦樂章歌詩贊頌碑銘文論箴表
傳錄書序凡百卷名文粹予在開封時得唐潭州刺史
張登文集一桀三卷權文公爲序其畧曰如求居寄別

懷人三賦與證相一篇意有所激鏘然玉振倘有繼昭
明之爲者斯不可遺也然觀文粹並不編載由是知姚
亦有未見者 塵史

疏淪澡雪使無落吾事則有洗心賦嚴棲賦

權德輿吳尊師集序

銑按吳尊師道士吳筠也

天寶末經術高第遇亂奉德清君夫人載家書隱于王
屋山間行以求食深處以修業作避暑賦

柳宗元先侍御史府君神

碑道

銑按子厚考諱鎮拜侍御史號爲剛直

大歷中公始來京師中書常舍人袞楊舍人炎讀其文
驚以相視曰子雲之徒也遊太原太原尹喜曰重客至

矣公曰某嘗爲北都賦未就願卽而就焉其宮室城郭
之大河山之富關閭之壯與其土疆之所出風俗之所
安王業之所由興苟得聞而覩之足矣遂逆大河踰北
山彷徨而歸賦成果傳天下

柳宗元唐故秘書
少監陳京行狀

黃滔字文江乾寧中進士受闕太祖辟中州名士避地
來聞若韓偓李洵輩悉主于滔滔文詞贍蔚典則詩清
淳丰潤有貞元長慶風馬嵬館娃景陽水殿諸賦雄新
雋永稱一時絕調

十國春秋

乾符僖宗
年號四年崔洵爲京兆尹復置等第差萬年縣尉
公乘億爲試官試火中寒暑退賦

王定保摭言

銑按新唐書藝文志公乘億賦集十二卷咸通進士

第字壽山

同川解最推利市與京兆無異若首選無不捷者元和
中令狐文公鎮三峯時及秋賦牘云特加置五場蓋詩
歌文賦帖經爲五場常年以清要書題求薦者不減十
數人其年莫有至者雖不遠千里而來聞是皆寢去唯
盧宏正尙書獨詣華請試公命供帳酒饌侈靡子往時
華之寄客畢縱觀于側宏正自謂獨步文場公命曰試
一場務精不務敏也宏正已試兩場而馬植下解植將
家子弟從事輩皆竊笑公曰此未可知旣而試登山採
珠賦畧曰文豹且異于驪龍採斯踈矣白石又殊于老
蚌剖莫得之公大伏其精當遂奪宏正解元後宏正自

丞郎將判離俄而爲植所據宏正以手札戲植曰昔日
華元已遭毒手今來離務又中老拳復自試破竹賦
銑按後漢書劉元傳李淑上書曰今以所重加非其
人望其毗益萬分興化致理譬猶緣木求魚升山採
珠

白樂天一舉及第詩曰慈恩塔下題名處十七人中最
少年樂天時年二十七省試性習相近遠賦攜之謁李
涼公逢吉公時爲校書郎于時將他適白遽造之逢吉
行攜行看初不以爲異及覽賦尾曰噫下自人上達君
咸德以慎立而性由習分逢吉大奇之遂寫二十餘本
其日十七本都出

銑按元稹白居易集序樂天二十七舉進士貞元末
進士尚馳競不尚文就中六籍尤擯落禮部侍郎高
郢始用經藝爲進退樂天一舉擢上第明年中拔萃
甲科由是性習相近遠元稹斬白蛇劍等賦洎百節
判新進士競相傳于京師又王應麟玉海云白居易
性習相近遠賦獨孤授放馴象賦皆當時試禮部對
偶之外意義可觀

貞元中李繆公先榜落矣先是出試楊員外於陵省宿
歸第遇程于省司詢之所試程探得賦藁示之其破題
曰德動天監祥開日華於陵覽之謂程曰公今年須作
狀元翌日雜文無名於陵深不平乃于故策子末繕寫

而斥其名氏攜之以詣主文從容給之曰侍郎今者所
試賦奈何用舊題主文辭以非也於陵曰不止題目向
有人賦次韻脚亦同主文大驚於陵乃出程賦示之主
文歎賞不已於陵曰當今場中若有此賦侍郎何以待
之主文曰無則已有則非狀元不可也於陵曰苟如此
侍郎已遺賢矣乃李程所作亟命取程所納面對不差
一字主文因而致謝於陵于是請擢爲狀元前榜不復
收矣或曰出榜重收

李繆公試曰五色賦及第賦頭八字曰德動天鑒祥開
日華後出鎮大梁聞浩虛舟應宏詞復試此題頗慮浩
賦逾已專馳一介取本旣至啓緘尚有憂色及覩浩破

題云麗日焜煌中含瑞光程喜曰李程在裏

銑按北夢瑣言李程以日五色賦擢第爲河南尹日試舉人有浩虛舟卷中行日五色賦程相大驚慮掩其美伸覽之次伏其才麗至末韻侵晚水以芒動俯寒山而秀發程相大吟曰李程賦具在瑞日何爲到夜秀發由是浩賦不能凌邁與撫言小異

崔元翰爲楊崖州炎所知欲奏補闕懇曰願進士由此獨步場中然不曉程試先求題目爲弟崔敖知之旭日都堂始開盛氣白侍郎曰白雲起封中賦敖請退主司于簾中卒愕換之是歲二崔俱捷

乾符中蔣凝應宏詞爲賦止及四韵遂曳白而去試官

不之信逼請所試擬以實告旣而比之諸公擬有得色
試官歎息久之頃刻之間播于人口或稱之曰白頭花
鈿滿面不若徐妃半粧

銑按新唐書藝文志蔣凝賦三卷咸通進士第字仲
山

貞元中樂天應宏詞試漢高祖斬白蛇賦考落蓋賦有
知我者謂我斬白帝不知我者謂我斬白蛇也然登科
之人賦並無聞白公之賦傳于天下也

宋濟老于詞場舉止可笑嘗試賦誤落官韻撫膺曰宋
五坦率矣由此大著後禮部上甲乙名明皇先問曰宋
五坦率否

李濤長沙人也篇詠甚著膾人口溫飛卿任太學博士
主秋試濤與衛丹張邵等詩賦皆榜于都堂
周緘者湖南人也咸通懿宗初以詞賦擅名緘嘗爲角
觥賦畧曰前衝後敵無非有力之人左攫右拏盡是用
拳之手

銑按漢書武帝紀元封三年作角觥戲音義兩兩相
當角力角伎藝射御故名角觥 緘疑觥字之誤觥
有登吳嶽羿射九日賦

周繁池州貴陽人也兄繇以詩篇中第繁工八韻有飛
卿之風

何涓湖南人也業辭嘗爲瀟湘賦天下傳寫少遊國學

同時潘緯者以古鏡詩著名或曰潘緯十年吟古鏡何涓一夜賦瀟湘

銑按王士禛曰文章遲速不同此由天性不關工拙故漢人云飛章馳檄用枚舉高文典冊用相如唐人詩云潘緯十年吟古鏡何涓一夕賦瀟湘又吳道子大李將軍俱畫嘉陵江山水于大同殿壁明皇曰李思訓數月之功吳道元一日之跡皆極其妙蓋又不獨文章爲然

盧延讓業癖溫詩吳翰林雖以賦卷擢第然八面受敵深知延讓之能延讓始投贊卷中有說詩一篇斷句云因知文賦易爲下者之乎子華笑曰上門惡罵來

銑按僞蜀盧延讓子善范陽人唐光化九年進士

謝廷浩閩人也大順

昭宗年號

中頗以辭賦著名與徐鉉不

相上下時號錦繡堆

趙隱試被袞象天賦更放韓袞爲狀元或爲中貴語之
曰侍郎旣試王者被袞以象天賦更放韓袞狀元得無
意乎隱由是求出華州

銑按韓文公子昶昶子綰袞皆擢第袞爲狀元君子
之澤深矣

崔郾侍郎旣拜命于東都試舉人三署公卿皆祖于長
樂傳舍冠蓋之盛罕有加也時吳武陵任太學博士策
蹇而至郾聞其來微訝之乃離席與言武陵曰侍郎以

峻德偉望爲明天子選才俊武陵敢不薄施塵露向者
偶見太學生十數輩揚眉抵掌讀一卷之書就而視之
乃進士杜牧阿房宮賦若其人具王佐才也侍郎官重
必恐未暇披覽于是播笏朗宣一徧郾大奇之武陵曰
請侍郎與狀頭郾曰已有人曰不得已卽第五人郾未
遑對武陵曰不爾卽請此賦郾應聲曰敬依所教旣卽
席白諸公曰適吳太學以第五人見惠或曰爲誰曰杜
牧衆中有以牧不拘細行間之者郾曰已許吳君矣牧
雖屠活不能易也

高貞公郾就府解後時試官別出題目曰沙洲獨鳥賦
郾援筆而成曰歟彼飛鳥在河之洲一飲一啄載沉載

浮賞心利涉之地浴質至清之流其年首選

銑按雲仙湘潭記高郢夜課于豐亭忽有一鼈在案上視之乃石也郢異其事取十題散置箱中祝令鼈啣之以卜來事旣而鼈舉頭乃是沙洲獨鳥賦其年果以是題首選

長沙曰試萬言王璘辭學富贍非積學所致崔詹事廉問特表薦之于朝先是試之于試院璘請書吏十人皆給筆硯璘纘絺捫腹往來口授十吏筆不停輟首題黃河賦三千字數刻而成復爲鳥散餘花落詩二十首援毫而就時風雨暴至數幅爲迴颺所卷泥滓沾漬不勝舒卷璘曰勿取但將紙來復縱筆一揮斯須復十餘篇

矣時未亭午已搆七千餘言詹事傳語試官曰萬言不在試限請屈來飲酒黃河賦復有僻字百餘請璘對衆朗宣旁若無人

段維或云忠烈之後性嗜煎餅嘗爲文會每箇煎餅纔熟而一韻賦成咸通乾符中聲名藉甚竟無所成而卒並全上

李白前後三擬詞選不如意悉焚之唯留恨別賦

酉陽雜俎

文宗元年秋詔禮部高侍郎鐫復司貢籍曰常年宗正寺解送人恐有浮薄以忝科名在卿精揀藝能勿妨賢路其所試賦則準常規詩依齊梁體格乃試琴琴合奏賦霓裳羽衣曲詩主司先進五人一詩最佳者則李肱

也乃以榜元及第

范攄雲
溪友議

銑按唐有兩霓裳曲開成初尉遲璋嘗放古作霓裳羽衣曲以獻詔以曲名賜貢院爲題是歲榜首李肱據肱詩則亦是祖述開元遺聲耳

張登長于小賦氣宏而密間不容髮有織成隱起往往

蹙金之狀

李肇國
史補

銑按陳氏書錄解題引此往往二字作結綵

前進士沈堯有洞庭樂賦韋八座岫謂朝賢曰此賦乃

一片宮商也

北夢
瑣言

陳會郎中家以當壚爲業其母甚賢勉以進修不許歸鄉以成名爲期郎中業八韻唯蝗螂賦大行太和元年

及第乃望善獎訓之力也

宏農楊敬之撰華山賦李太尉每置座右行坐諷之此乃寄意于華山而言世事實雄才也 並仝上

銑按李太尉德裕也

杜黃裳知貢舉聞尹樞時名籍籍乃微服訪之問場中名士樞唯唯黃裳乃具告曰某卽今年主司也受命久矣唯得一人其他相煩指列樞聳然謝曰旣辱下問敢有所隱卽言子弟崔元畧孤寒有林藻令狐楚數人黃裳大喜其年樞狀頭及第試珠還合浦賦成或假寐夢人告曰何不序珠來去之意旣寤乃改數句及謝恩黃裳謂之曰序珠來去之意如有神助 玉泉子

唐昭宗乾寧二年試進士刑部尙書崔凝下二十五人放榜後宣詔翰林學士陸衰秘書監馮渥入內于武德殿前復試但放十五人自狀頭張貽範以下重落其六人許再入舉場四人所試最下不許再入崔凝坐貶台州刺史詩賦各兩篇內良弓獻問賦以太宗問工人木心不正脉理皆邪若何道理十七字皆取五聲字依輪次以雙周隔句爲韻限三百二十字成貽範等六人訖唐末不復綴榜蓋是時不糊名一黜之後主司不敢再收抬也有黃滔者是年及第閩人也九世孫沃爲吉州永豐宰刊其遺文初試覆試凡三賦皆在焉曲直不相入賦以題中曲直兩字爲韻釋云邪正殊途各有好惡

終篇只押兩韻良弓獻問賦取五聲字次第用各隨聲爲賦格于是第一韻尾句云資國祚之崇崇上平聲也第二韻垂寶祚予縣縣下平聲也第三韻曾非唯唯上聲也第四韻露其言而粲粲去聲也而闕入聲一韻賦韻如是前所未有

客齋四筆

晚唐士人作律賦多以古事爲題寓悲傷之旨如吳融徐寅諸人是也黃滔亦以此擅名有明皇回駕經馬嵬坡隔句云日慘風悲到玉顏之死處花愁露泣認朱臉之啼痕褒雲萬疊斷腸新出于啼猿秦樹千層比翼不如于飛鳥羽衛參差擁翠華而不發天顏愴恨覺紅袖以難留神仙表態忽零落以無歸雨露成波已沾濡而

不及六馬歸秦却經過于此地九泉隔越幾悽惻于平生
景陽井云理味納隍處窮泉而詎得誠乖馭朽攀素
纒以胡顏青桐有恨也從零落于秋風碧浪無情寧解
流傳于夜壑荒涼四面花朝而不見朱顏滴瀝千尋雨
夜而空啼碧溜莫可追尋王樹之歌聲邈矣最堪惆悵
金瓶之咽處依然館娃宮云花顏縹緲欺樹裏之春風
銀焰熒煌却城頭之曉色恨留山鳥啼百草之春紅愁
寄隴雲鐫四天之暮碧遺堵塵空幾踐羣遊之鹿滄洲
月在寧銷怒觸之濤陳皇后因賦復寵云已無爲雨之
期空懸夢寐終自凌雲之製能致烟霄秋色云空三楚
之暮天樓中歷歷滿六朝之故地草際悠悠白日上昇

云較美古今列子之乘風固劣論功晝夜姮娥之奔月
非優凡此數十聯皆研確有情致若夫格律之卑則自
當時體如此耳全上

進士李爲作淚賦及輕薄暗小四賦李賀作樂府多屬
意花草蜂蝶之間二子竟不遠大文字之作可以定相
命之優劣矣

唐趙璘
因話錄

裴晉公貞元中作鑄劍戟爲農器賦其首云皇帝之嗣
位三十載寰海鏡清方隅砥平驅域中盡歸力穡示天
下不復用兵憲宗平蕩宿寇數致太平正當元和十三
年而晉公以文儒作相竟立殊勲爲章武佐命觀其辭
賦氣概豈得無異日之事乎

因話錄

溫庭筠字飛卿才思艷麗工于小賦每入試押官韻作賦凡人叉手而入韻成多爲隣鋪假手沈詢侍郎知舉別施鋪席授庭筠不與諸公隣比翌日簾前謂庭筠曰向來策名者皆是文賦託于學士某今歲場中並無假託學士勉旃因遣之由是不得如意也

北夢
書言

劉蕡楊嗣復門生也唐登科記寶歷

敬宗
年號

三年楊嗣復

下三十五人裴休等時蕡第十九賦齊魯會于夾谷賦晦日與同志昆明池泛舟詩及第策直言中官嫉怒仇士良謂嗣復曰奈何以國家科第放此風漢耶嗣復懼曰昔與蕡及第時猶未風耳

王泉子

薛逢命一道士貌真自爲贊曰壯哉薛逢長一尺五寸

放筆終未盡續一旦忽有羽衣詣門延之與語忽于東壁見真贊讀之命筆續之曰手把金鉤鑿開混沌長揖而去不知所之逢作混沌賦馳名

錢希白南
部新書

楊盈川顯慶

高宗
年號

五年待制宏文館時年方十一上元

三年制舉始補校書郎尤最深于宣夜之學故作老人

星賦尤佳

全上

銑按盈川有渾天賦二千餘言序云補校書郎朝夕靈臺之下脩見銅渾之儀代之言天者未知渾蓋孰是代之言天命者以爲禍福由人故作渾天賦以辨老人星特小賦耳恐希白錯記也

贊皇文辭甚可愛也其所及禍或責其不能自免然古

今聰明賢智之士不能免者多矣豈獨斯人也歟

歐陽文忠

公集古錄跋唐李德裕大孤山賦尾

銑按北夢瑣言西江中有兩山孤拔號大者爲大孤小者爲小孤朱崖李太尉有大孤山賦寄意焉後人語訛作姑姊之姑創祠山上風濤甚惡行旅憚之

晁无咎曰昔揚雄作酒箴謂鴟臮盛酒而瓶藏水酒甘以喻小人水淡以比君子故鴟臮以親近托車而瓶以踈遠居井爲羸此雄欲同塵于皆醉者之辭也故子厚復正論以反之以謂寧爲瓶之潔以病已無爲鴟臮之甘以愚人蓋更相明也

或曰柳子厚瓶賦拾酒箴而作非也子雲本以諷諫設

問以見意耳當復有咎酒客語而陳孟公不取故史略
之子厚蓋補亡耳然子雲論屈原伍子胥晁錯之流皆
以不智譏之而子厚以瓶爲智幾于信道知命者子雲
不及也子雲臨憂患顛倒失據而子厚不足觀二人當

有愧于斯文也耶

東坡志林

嶺外俗皆恬殺牛而海南爲甚病不飲藥但殺牛以禱
地產沉水香香必以牛易之黎黎人得牛皆以祭鬼無
脫者中國人以沉水香供佛煬帝求福此皆燒牛肉也
何福之能得哀哉予莫能救故書椰子厚牛賦以遺瓊
州僧道贊使以曉喻其鄉人之有知者庶幾其少哀乎

東坡書椰子厚牛賦後

銑按黃氏曰抄牛賦謂利滿天下肩尻莫保

楊評事文集楊凌撰柳子厚作後序云遠遊賦七夕賦
皆文人之選

唐以賦取士而韻數多寡平側次序元無定格故有三
韻者花萼樓賦以題爲韻是也有四韻者萸莢賦以呈
瑞聖朝舞馬賦以奏之天廷丹旣賦以國有豐年泰階
六符賦以元亨利正爲韻是也有五韻者金莖賦以日
華川上動爲韻是也有六韻者止水颺颺人鏡三統指
歸信及豚魚洪鐘待撞君子聽音東郊朝日蜡日祈天
宗樂德訓胄子諸篇是也有七韻者日再中射己之鵠
觀紫極舞五聲聽政諸篇是也八韻有二平六側者六

瑞賦以儉故能廣被褐懷玉日五色賦以日麗九華聖
符土德徑寸珠賦以澤浸四荒非寶遠物爲韻是也有
三平五側者宣耀門觀試舉人以君聖臣肅謹擇多士
懸法象魏以正月之吉懸法象魏元酒以薦天明德有
古遺味五色土以王子畢封依以建社通天臺以洪臺
獨出浮景在下幽蘭以遠芳襲人悠久不絕日月合璧
以兩曜相合候之不差金柅以直而能一斯可制動爲
韻是也有五平三側者金用礪以商高宗命傳說之官
爲韻是也有六平二側者旗賦以風日雲舒軍容清肅
爲韻是也自太和以後始以八韻爲常唐莊宗時嘗覆
試進士翰林學士承旨盧質以后從諫則聖爲賦題以

堯舜禹湯傾心求過爲韻舊例賦韻四平四側質所出
韻乃五平三側大爲識者所誚豈非是時已有定格乎
國朝太平興國三年九月始詔自今廣文館及諸州府
禮部試進士律賦並以平側次用韻其後又有不依次
者至今循之

容齋
續筆

銑按唐人花萼樓賦凡五首皆以花萼樓賦一首并
序爲韻並非三韻也東郊朝日有陸宣公賦以國家
行仲春之令爲韻七韻非六韻也宣輝門觀試舉人
有二賦非謹字乃精字幽蘭有五首俱以遠芳襲人
終古無絕爲韻金柅有孫汝玉賦乃貞字非直字也
李昂有旗賦舒乃野字容乃國字豈容齋失攷耶抑

今所存非當日容齋所見之賦耶

廣記云唐制舉人試日既暮許燭燒三條舊說亦言舉人試日已晚主文權德輿於簾下戲云三條燭盡燒殘舉子之心而舉子遽答云八韻賦成驚破侍郎之膽

錄齊漫

某見寓監司行館下臨二江有樓劉夢得楚望賦句句

是也

東坡答張文潛尺牘

杜牧之阿房宮賦長橋臥波未雲何龍正本原是雲字後人傳寫之訛云未雩何龍殊爲無理左傳龍見而雩注謂龍星也非龍也龍星未見則不之雩今日未雩則龍當未見何形可見龍又星名何有于長橋之勢哉又

此賦善於用事凡作文之法經可證史史不可證經前
代史可證後代史後代史不可以證前如阿房宮賦所
用事不出于秦時只烟斜霧橫焚椒蘭也兩句尤不可
及六經只以椒蘭爲香如有椒其馨其臭如蘭蘭有國
香是也楚辭亦只以椒蘭爲香如椒漿蘭膏是也沈檀
龍麝等字皆出于漢西京以後詞人方引用至唐人詩
文則盛引沈檀龍麝爲香而不及椒蘭矣牧此賦獨引
椒蘭是不以秦時所無之物爲香也只如近世文人作
漢宮詞婕妤怨明如曲而引用梅妝蓮步字尤爲可笑
此皆齊末以後事漢時寧見此而效之耶劉觀堂所謂
不善用事爲事所使殆謂此也

史繩祖學
齋帖畢

唐人作賦多以造語爲奇杜牧阿房宮賦云明星熒熒
開鈺鏡也綠雲擾擾梳曉鬟也渭流漲賦棄脂水也烟
斜霧橫焚椒蘭也雷霆乍驚宮車過也輾輾遠聽杳不
知其所之也其比興引喻如是其侈然楊敬之華山賦
又在其前敘述尤壯曰見若咫尺田千畝矣見若環堵
城千雉矣見若杯水池百里矣見若蟻蛭臺九層矣醯
雞往來周東西矣蠛蠓紛紛秦速亡矣蜂窠聯聯起阿
房矣俄而復然立建章矣小星奕奕焚咸陽矣累累蘭
栗祖龍藏矣後又有李庾者賦西都云秦址新矣漢址
蕪矣西去一舍鞠爲墟矣代遠時移作新都矣其文與
意皆不逮楊杜遠甚高彥休闕史云敬之賦五千字唱

在人口賦內之句如上數語杜司徒佑李太尉德裕當
所誦念牧之乃佑孫則阿房賦實倣模楊作也

容齋五筆

潘子真詩話云南豐先生曾子固言阿房宮賦鼎錯玉
石珠璣金礫棄擲邈迤秦人視之亦不甚惜現當作塊
言秦人視珠玉如土塊瓦礫也又言牧賦宏壯巨麗馳
騁上下累數百言至楚人一炬可憐焦土其論盛衰之
變判于此矣

漁隱叢話

東坡在雪堂一日讀杜牧之阿房宮賦凡數遍每讀徹
一遍卽再三咨嗟歎息至夜分猶不寐有二老兵皆陝
人給事左右坐久甚苦之一人長歎操西音曰知他有
甚好處夜久寒甚不肯睡連作冤苦聲其一曰也有兩

句好

西人皆作吼音

其人大怒曰你又理會得甚底對曰我愛

他道天下人不敢言而敢怒叔黨臥而聞之明日以告

東坡大筴曰這漢子也有鑒哉

道山清話

奏王安石變更法度物議沸騰人心不寧書曰怨豈在明不見是圖願陛下圖不見之怨上曰何謂不見之怨公曰杜牧所謂天下之人不敢言而敢怒者此不見之怨也上曰卿才如此善論事宜

范忠宣公行狀

荀子曰千萬人之情一人之情是也阿房宮賦之語本

此

田學紀聞

揚州蘇隱夜臥聞被下有數人齊念阿房宮賦聲繁而小急開被視之無他物唯得錢十餘其大如豆殺之卽

止馮贊雲
仙雜記

杜牧晚晴賦忽引舟于深灣視八九之紅菱姍然如婦

嫺然如女菱菱也牧乃指爲荷花隱居詩話

唐吕溫作由鹿賦曰由此鹿以致他鹿故曰由鹿予按

說文曰率鳥者繫生鳥以來之名囹圄音由吕得其意

而不知說文有此囹字也朱景文公筆記

司馬溫公論九旗之各旗與旂相近詩曰言觀其旂左

傳龍尾伏辰取號之旂然則此旂當爲芹音周人語轉

亦如關中以中爲蒸蟲爲塵丹青之青爲要也五方語

異閩以高爲歌荆楚以南爲難荆爲斤昔閩士作清明

象天賦破題云天道如何仰之彌高會考官同里遂中

選向敏中鎮長安土人不敢賣蒸餅恐觸中字諱也劉貢

父詩話

黯去歲自褒中還輦下輔文出新試相示其間有江南春賦篇末云今日併爲天下春無江南兮江北某卽賀其登選于時矣何者以輔文家于江南其詞意有是非前联耶今春果擢上第陳黯送王梁序

銑按麟角集唐水部郎中福清王榮撰有唐鄉貢進士黃璞撰傳一篇附

李相國揆以進士調集在京師聞宣平坊王生善易筮往問之生爲之開卦曰君非文字之選乎當得河南道一尉揆負才華不宜爲此色悵然而去王生曰君無快

快自此數月當爲左拾遺前事固不可涯也揆怒未解
生曰若果然幸一枉駕揆以書判不中第補汴州陳留
尉始以王生之言有徵復詣之生于几下取一緘書可
十數紙以授之曰君除拾遺可發此緘不爾當大咎揆
藏之旣至陳留時採訪使倪若水以揆才華族望留假
府職會郡有事須上請擇與中朝通者無如揆乃請行
開元中郡府上書姓李者皆先謁宗正時李璆爲宗正
適遇上尊號揆旣謁璆璆素聞其才請爲表三通以次
上之上召璆曰百官上表無如卿者朕甚佳之璆頓首
曰此非臣所爲是臣從子陳留尉揆所爲乃下詔召揆
時揆寓宿于懷遠坊盧氏姑之舍子弟聞召且未敢出

及知上意欲以推擇遂出既見乃宣命宰臣試文詞時
陳黃門爲題目三篇其一曰紫絲盛露囊賦二曰答吐
番書三曰代南越獻白孔雀表揆自午及酉而成既封
請曰前二首無所遺恨後一首或有所疑願得詳之乃
許拆其緘塗八字旁注兩句既進翼日授左拾遺旬餘
乃發王生之緘視之三篇皆在其中而塗注者亦如之
遽命駕往宣平坊訪王生則竟不復見矣

鍾輅前
定錄

王無功遊北山賦序云余周人也本家于祁永嘉之際
扈遷江左地實儒素人多高烈穆公銜建元之恥歸于
洛陽同州悲永安之事退居河曲始則晉陽之開國終
乃安康之受田其賦云白牛溪裏岡巒四峙信茲山之

輿域皆吾兄之所止許由避地張超成市察俗刪詩依
經正史組帶青衿踣鏘儼儼階庭禮樂生徒杞梓山似
尼邱泉疑泗渙又注云此溪之集門人常以百數河南
董恒南陽程元中山賈瓊河南薛收太山姚義太原溫
彥博京兆杜淹等十餘人稱爲俊穎而姚義慷慨同儕
方之仲由薛收以理達方莊周門人多至公輔而文中
之道未行然無功不及房魏何哉鄭毅夫論中說之妄
謂李德林卒于開皇十二年通時年八九歲未有門人
而有德林請見歸而有憂色援琴鼓蕩之什門人皆霑
襟關子明太和中見魏孝文如存于開皇間亦一百二
三十歲矣而有問禮于子明是二者其妄不疑晁氏讀

書志謂薛道衡仁壽二年出襄州通仁壽四年始到長安其書有內史薛公見子于長安用此推之則以房杜爲門人抑又可知也

困學紀聞

銑按文中子門徒當以賦注爲據 負苓者傳文中子講道于白牛之溪

余昔于江陵見天台司馬子微謂余有仙風道骨可與神遊入極之表因著大鵬遇希有鳥賦以自廣此賦已傳于世往往人間見之悔其少作未窮宏達之旨中年棄之及讀晉書觀阮宣子大鵬讚鄙心陋之遂更記憶多將舊本不同今復存于集豈敢傳諸作者庶可示之

子弟而已

李白大鵬賦序

杜甫三大禮賦辭氣壯偉非唐初餘子所能及也

書錄解題

喬彞京兆府解試時有二試官彞日午叩門試官令引入則已醺醉視題曰幽蘭賦彞不肯作曰兩箇漢相對作得此題速改之遂改渥洼馬賦曰此可矣奮筆斯須而成警句云四蹄曳練翻瀚海之驚瀾一噴生風下胡山之亂葉便欲首選京兆曰喬彞崢嶸甚以解副薦之可也

張固幽
閒鼓吹

銑按渥洼馬賦今傳彞又有幽蘭賦

衡山縣志遺逸門一段云唐寇豹與謝觀同在崔裔孫門下以文藻知名豹謂觀曰君白賦有何佳語對曰曉入梁王之苑雪滿羣山夜登庾亮之樓月明千里觀謂

豹曰君胡不作赤賦豹曰田單破燕之日火燎于原武

王伐紂之年血流漂杵

楊升庵燕林伐山

予讀翱幽懷賦置書而歎歎已復讀不自休恨翱不生
于今不得與之交又恨予不得生翱時與翱上下其論
也凡昔翱一時人有道而能文者莫若韓愈愈嘗有賦
矣不過羨二鳥之光榮歎一飽之無時爾此其心使光
榮而飽則不復云矣若翱獨不然其賦曰衆囂囂而雜
處兮咸歎老而嗟卑視予心之不然兮慮行道之猶非
又怪神堯以一旅取天下後世子孫不能以天下取河
北以爲憂嗚呼使當時君子皆易其歎老嗟卑之心爲
翱所憂之心則唐之天下豈有亂亡哉然翱幸不生今

時見今之事則其憂又甚矣奈何今之人不憂也

歐陽文忠

公讀李翱文

銑按慈溪黃東發曰公盖有感之言也

唐文多有遺佚要切者如宋璟梅花賦皮日休謂其清便富艷有南朝徐庾體因效之爲桃花賦今皮之桃花賦尙傳而宋之梅花賦乃不傳又唐末張曙中和間舉進士避難到巴州宴于郡樓坐中作擊甌賦極精工郡樓由賦顯名後人遂命之曰擊甌樓而此賦亦不傳如姚鉉編唐文粹及蜀本唐三百家文粹唐七十家大全集及國初館閣所編文苑英華唐人花木音樂賦各有十餘卷而此兩賦俱不在唯擊甌則巴州郡樓尙有碑

刻曾祖作已倖時曾有墨本藏之家今兵火後碑亦壞
矣恐其歲久則此賦亦泯沒無攷故全錄之尙幾有傳
如廣平梅花賦則平生尋訪終不得見是可惜也俟更
博訪之今先錄張之賦于后云云唐文士于尊祖頃刻
之間作此等大篇之文豈不偉哉

學齋
帖畢

銑按北夢瑣言唐右補闕張曙文章秀麗精神敏俊
甚有時稱于裴贄侍郎下擢進士第曙有擊甌賦其
警句云董雙成青瑣鸞飢啄開珠網穆天子紅韁馬
解踏破瓊田又有鄆郊賦敘長安亂離亦哀江南悲
甘陵之比

余嘗慕朱廣平之爲相貞姿勁質剛態毅狀疑其鐵腸

與石心不解吐婉媚辭然觀其文而有梅花賦清便當
艷得南朝徐庾體殊不類其爲人也後蘇相公味道得
而稱之廣平之名遂振嗚呼夫廣平文才未爲是賦則
蘇公果暇知其人哉將廣平困于窮阨于躓然後強爲
是文耶曰休于文尙矣狀花卉體風物非有所諷輒抑
而不發因感廣平之所作復爲桃花賦皮日休桃花賦序
銑按廣平梅花賦史繩祖學齋卮畢周公謹癸辛雜
識俱云不傳周又云近徐子方以江右所刊者出觀
其文猥陋全不成語不善作僞者也

開元中高力士使閩粵見江采蘋少麗選歸侍明皇大
見寵幸性喜梅上以其所好戲名曰梅妃後楊貴妃入

侍寵愛日奪妃遷于上陽東宮妃在上陽宮一日上憶
之夜遣小黃門以馬召妃至翠華西閣敎舊愛既而上
失寤侍御驚報曰楊妃已至閣前當奈何上披衣抱妃
藏夾幕間楊妃既至大怒曰肴核狼籍御榻下有婦人
遺舄夜來何人侍陛下寢懽醉至于日出不視朝上媿
甚以衾向屏復寢曰今日有疾不可臨朝楊妃怒甚徑
歸私第上頃覓梅妃所在已爲小黃門送令步回東宮
上怒斬之遺舄并翠鈿命封賜妃妃以千金壽高力士
求詞人擬司馬相如爲長門賦欲邀上意力士方奉太
真且畏之報云無人解賦妃乃自作樓東賦

淵鑑類函

徐寅唐末號能賦謁朱全忠誤犯其諱全忠色變寅狼

猥走出未及門全忠呼知客將責以不先告語斬于界
石南賓欲遁去恐不得脫乃作過太原賦以獻其畧曰
千金漢將感精魄以神交一眼胡奴望英風而膽落全
忠大喜遺絹五百疋全忠自言夢見淮陰使受兵法一
眼胡奴指李克用也寅雖免一時之禍殊不憂一眼胡
奴見此賦也可笑

東坡
志林

徐君端衡出其十一世祖唐正字公資文集又纂輯公
遺事及年譜以示余按劉山甫誌墓詩賦外有著書二
十卷溫陵集十卷南渡初公族孫著作郎師仁作集序
有雅道機要一卷得于蔡君謨家者今皆不傳所傳者
律賦及探龍集各五卷詩八卷而已夫士不幸而不遇

于當時所賴以自見于後世者書爾而公所著他書皆
羽化惟詩賦與儷語僅存豈不重可歎歟然其僅存者
已足與子華致光並驅矣唐人最重公賦目爲錦繡堆
日本諸國至以金書人生幾何御清水斬蛇劍等篇爲

屏幃

劉後村徐
先輩集序

銑按後村跋語徐先輩唐末擢第不肯仕朱梁歸死
于莆其墓只書唐徐先輩與朱文公書晉處士陶潛
何異觀此志林語恐不足信

登白樓賦令狐楚撰白樓在河中至楚子綯爲河中節
度使乃刻于石綯父子爲唐顯人仍世宰相而楚尤以
文章見稱世傳綯爲文喜以語簡爲工楚之此賦文無

他意而至千有六百餘言何其繁也其父子之性相反

如此信乎堯朱之善惡異也

歐陽文忠公集古錄跋尾

李商隱江之嬌賦云豈如河畔半星隔歲止聞一過不

比苑中人柳終朝剩得三眠漢苑有人形柳一日三起

三倒

侯鯖錄

銑按唐宋藝文志俱載李商隱賦一卷宋晁公武讀

書志李商隱文集八卷古賦及文共三卷辭旨恢譎

宋景文序傳中稱詭怪則李商隱蓋以此今所傳賦

唯蝨賦及江之嬌一聯耳

陸龜蒙善爲賦絕妙人有收得賦林皆綴緝屬對差次

比擬凡數首有題而未就其用工如此

談苑

皮日休曾謁歸融尚書不見因撰夾蛇龜賦譏其不出頭也而歸氏子亦撰皮靴鞋賦通相謗誚皮自號間氣布衣

北夢瑣言

唐乾寧中劉昌美典夔州時屬夏潦峽漲湍險行旅輟棹而候水平去焉有朝官李蕤寧士挈家自蜀沿流將之江陵郡牧以水勢正惡且望少駐以圖利涉隴西忽遽若爲人所促召堅請東下不能止之才鼓行橈長揖而別州將目送之際盤渦呀裂破其船而倒李一家溺死初隴西文賦中有金釵墜并賦至是讖焉

全上